

IDEAM  
BONI MEDICI  
CASTRENSIS

INAVGVRALI HAC DISSERTATIONE  
ADVMBRATAM

*AUTORITATE ET CONSENSV*

GRATIOSI

MEDICORVM ORDINIS

IN

INCLYTO NORIMBERGENSIUM LYCEO

PRO LICENTIA

HONORES ET PRIVILEGIA

DOCTORVM

SOLENNI RITV CONSEQVENDI

PVBlice EXAMINANDAM PROPONET

*A. D. IV. APRIL. A. R. S. c1010cccxi*

AVGVSTVS FLECK

LEOSTEINENSIS MISNICVS.

---

*ALTORFI NORIC.*


LITERIS IOD. GVIL. KOHLESII ACAD. TYPOGR.



Digitized by the Internet Archive  
in 2019 with funding from  
Wellcome Library

<https://archive.org/details/b30773957>





## PRAEFATIO.

**M**edicinae præstantiam, & super alias artes  
atque disciplinas complures eminentiam,  
haud parum ex hoc æstimari posse arbitror,  
quod illa non pacis tantum, sed & belli tempore, usum  
conferat mortalibus amplissimum. Quin tunc inprimis  
elucet divinæ illius artis utilitas, quando bellum geri-  
tur, mutuisque cladibus populi atteruntur, neque saucio-  
rum saltem, sed & variis morbis, fame, labore metu,  
terrore productis, oppressorum hominum multitudo exi-  
stit. Tunc sane quemadmodum maior est necessitas Me-  
dicinae, quam in pacato rerum statu, ita quoque ipsius  
benignitas clarius apparet, ubi omnibus promiscue affli-  
ctis, non amicis tantum, sed & hostibus captivis eadem  
opitulari contendit. Ex quo simul cognosci potest, quan-  
ta sit Medici castrensis bene constituti dignitas, qui ur-  
gente adeo necessitate, cum periculo vitæ propriæ, com-  
pluribus, alias certo perituris, auxilium affert atque vi-  
tam



*tam conseruat. Hac ipsa de causa vetustissimis temporibus celebrati sunt PODALIRIVS & MACHAON, Aesculapii duo filii, quod in bello Traiano ducem Agamemnonem secuti, non mediocrem opem commilitonibus suis attulerint, idem hoc ex Iliade Homeri narrante Celso. Neque etiam post Aesculapii Numen antiquiores in historia commemorantur Medici, illis eius filiis, ut adeo per hos ars Medica in castris veluti nata, certe plurimum amplificata, & illustrata fuerit. Quæ vero quondam populis belligerantibus non tantum utilis sed necessaria plane visa fuit medicorum in exercitibus & castris præsens opera, eadem hodieque non minus apud omnes bene moratas gentes in pretio esse solet. Quo maior autem existit utilitas, atque dignitas eiusmodi viri Medici, ut is proprie Homericæ elogio prædicetur*

Πολλῶν ἀντάξιος ἄλλων :

*eo facilius apparet, quod talis, siquidem officii sui gravitatem & gloriam tueri vult, singularibus, partimque ultra communem Medicorum conditionem, eminentibus quibusdam virtutibus ac proprietatibus pollere debeat. Has igitur paulo curiosius inquirendas & declarandas, inaugurali specimine ut mihi sumerem, vel ideo non alienum a me esse putavi, quod & ipse aliquando idem vitæ genus atque munus amplecti desiderem, si Deo ita visum fuerit.*



## A circular emblem with a thick, dark border. Inside the circle is a stylized, flame-like or leaf-like design, possibly representing a religious or historical symbol. The emblem is surrounded by a decorative border consisting of horizontal lines and a curved, flame-like shape at the top. The entire image is rendered in a high-contrast, black and white style, typical of a woodcut or a stylized illustration.

11.



lixæ multitudinî curandæ, unicum hominem sufficere, tantum non incredibile est.

### III.

Cæterum de *Chirurgis castrensibus* quæri posset, num & ipsi in muneris illius partem veniant? Quamvis autem proh dolor! ad multas alias militum calamitates hoc etiam sæpiusculè accedat, ut in tanta paucitate, vel in absentia legitimorum Medicorum, Chirurgi horum vicem sustinere soleant, homines plerumque admodum rudes ac temerarii, quos non iniuste nec illepide *tonsores aut vexatores campestres, si-ve agrestes* potius, quam *Chirurgos castrenses* appellaveris: Cuiuscunque demum bonitatis ac peritiæ fuerint, tam superioris quam inferioris ordinis, *Regiments- und Compagnie-Feldscherer* / Medicorum tamen titulum isti non merentur. Sunt enim saltem *ministri & famuli*, qui ad eorundem arbitrium & mandatum tractare saucios, & medicamenta ægris administrare tenentur. Idem quoque accipiendum est de *Pharmacopolis castrensibus*.

### IV.

Quod autem attinet ad *qualitates, quibus instructus esse debet Medicus castrensis*, illæ quidem multæ sunt ac variæ, partim *communes* aliis, medicinam laudabiliter facturis, partim *proprie magis*. Ego, quæ *potiores* esse mihi videbuntur, breviter enarrabo. Primum igitur, *ex parte corporis, Medicum castrensem acturi*, requiritur, *ut firma gaudeat valetudine*, & huius beneficio perferre queat frequentes illas & fere quotidianas ærumnas, modo frigoris, modo caloris, nunc famis, nunc sitis, pravique victus, vigiliarum item ac itinerum incommoda, quibus nemo non expositus esse solet qui militiam sequitur, tantum abest, ut Medicus ab iisdem liber in castris degere possit.



V.

Ad corporis laudabilem conditionem, & meliorem hinc *Medici castrensis* existimationem non parum facit, quando is *statura non admodum parva, sed habitu membrorum paulo robustiore, vultuque ad virilem gravitatem composito est præditus.* Cum enim præcipua hominum pars, quibuscum ipsi res & negotium est, externis huiusmodi qualitatibus imprimis capiatur, talium præsentia utique plus fiduciæ & obsequii erga Medicum suscitare poterit. Quare etiam consultum est, honestam illam naturalem corporis formam ac dispositionem, *decenti pariterque honesto vestitu* amplius exornare. Et hæc quidem talia cumpluraque alia externa, quamvis ad τὸ εὖ εἶναι saltem conducant, iam pridem tamen serio commendavit *Hippocrates* locis variis, præsertim *libellis de Medico ac decenti ornatu*; ubi is etiam ex altera parte cavendam admonet *περιεργίαν*, sive *nimiam in exornando corpore curiositatem, motuumque ac gestuum singularium affectationem.*

VI.

Maioris autem utique momenti & necessitatis res est *integritas sensuum*, quos *externos vocant*, præcipue *visus & auditus*, quorum ministerio signa & status morborum cognosci imprimis debent. Neque etiam *tactionis* acie usuque expedito carere *Medicus castrensis* commode potest, non solum ad explorandum sanguinis per arterias motum, aut pulsum, sed etiam ad tumorum, luxationum, fracturarum, telorum intra corpus hærentium &c. conditionem pernoscentiam. De *olfactu & gustatu*, per jocum hoc dixerim, *hos sensus Medico castrensi exoptandos esse hebetiores*, ita enim multum fastidii devitabit, quod communis militum squalor atque frequens laborantium foetor, tum & alimentorum vitia malæque præparationes homini delicatiorum narium atque palati afferre solent.

VII.



## VII.

Circa *etatem*, quæ *militaris Medicinæ* exercitationi maxime idonea & conveniens sit, vix quicquam determinare audeo, quo magis constat frequentibus exemplis, tam *juvenes* quam *senes* eandem spartam æque feliciter ac laudabiliter sustinuisse. Videtur tamen *etas media & virilis*, aut certe *juvenilis paulo provectior*, ceteris paribus, opportuna imprimis esse, quod tunc non minus animi quam corporis alacritas & robur integrum existere soleat. Sicut autem *adolescens* aut *valde juvenis*, etiamsi doctus & rei Medicæ gnarus, propter solum ætatis suæ præjudicium, facile in contemptum adduci potest, ita ex adverso de *senectute*, in respectu ad *officium Medici castrensis*, idem usu venire potest, quod de vita militari generatim Poeta cecinit,

*Turpe senex miles.*

Certe *senilis ætas*, uti variis calamitatibus obnoxia communiter est, ac *ipse morbus* adagio dicitur, ad perferendas illius muneris ærumnosi molestias incommoda plurimum apparet.

## VIII.

*Animi* autem *virtutes*, quibus pollere decet *Medicum castrensem*, primario quidem in *sagaci rectoque iudicio* consistunt, ut morborum naturam, causas & statum bene cognoscere, & *valde similia prudenter distinguere* possit; deinde, ut indicantibus illis rebus congruentia indicata sive remedia invenire ac tempestive præscribere queat. Insuper hæc *consilio promptus* esse debet; atque *ad agendum expeditus*. Cum enim inter milites celeria plerumque morborum genera grassentur, e. g. febres acutæ ac malignæ, dysenterix, pleuritides, periculosa vulnera, & quæ his frequenter superveniunt, hæmorrhagiæ immodicæ & gangrænæ &c. talibus sane malis curan-



curandis ac profligandis celeri utique opus est auxilio, & sæpe ideo *ex arena* (quod dicitur) *capiendum est consilium*.

## IX.

Decet porro *Medicum castrensem*, ut animo sit intrepidus & immisericors, eo quidem sensu, quo *Celsus* idem seorsim in chirurgo illius generis requirit, ut *sanari velit eum quem accepit, non ut clamore ejus motus, vel magis quam res desiderat, properet, vel minus quam necesse est, secet* (aut remedia quæcunque insuavia, dummodo utilia adhibeat) *sed perinde faciat omnia ac si nullus ex vagitibus alterius affectus oriretur*. Illam vero animi constantiam ac fortitudinem moderari convenit sollicita quadam *circumspectione*, cavendo tamen ne hinc ad *alterum timiditatis extremum* fiat transitus: hæc etenim in Praxi Medica damnosior interdum evenire solet ipsa *audacia*; quemadmodum *Aemilius Campolongus*, magni quondam nominis Professor Medicinæ Patavinus, hoc aliquando dixisse fertur: *audacia nunquam perituit me, timiditatis semper*. Siquæ autem iusta sollicitudo animum occupaverit, dissimulare hanc quodammodo consultum est, ne ægrotus, Medicum perturbatum conspiciens, de salute sua ipsemet desperet.

## X.

Quando vero *manifestum* adest *vite periculum*, id non penitus occultare, quin potius laboranti homini, aut certe amicis eius, vel etiam superioribus aperire decet, atque adeo ex *Corn. Celsi Lib. V. cap. 26.* pleno prudentiæ consilio: *Vbi gravis metus, sine certa tamen desperatione est, indicare necessariis periclitantis, in difficili rem esse: ne, si victa ars malo fuerit, vel ignorasse, vel fefellisse videatur. Sed ut hæc prudenti viro conveniunt, sic rursus histrionis est, par-*  

B

*vam*



*nam rem attollere , quo plus prastitisse videatur : hæc ille. Ut vero , sive periculum minitanti , sive salutem auguranti , & quicquid huius in gratiam , aut faciendum aut omittendum sit , præcipienti Medico fides habeatur , eloquentia ipsi opus est ad persuadendum ; quæ quidem ita temperari debet , ne loquacitatis speciem præ se ferat. Sæpe etiam necesse est gravi sermone verbisque asperis ægrotantes in officio continere : Quia enim milites severo in universum imperio astricti & assuefacti iam sunt , non admodum alia ratione a Medico tractari volunt , aut certe satis commode queunt.*

## XI.

*Quas hæctenus proposui qualitates animique dotes , Medico castrensi necessarias , tametsi quædam a natura possint ac soleant obtingere , complures tamen disciplina & exercitatione adipiscendas esse , vel me tacente , nemo non intelligit. Quare , quod Hippocrates , in sua Lege , a quovis Medicinam feliciter facturo , post naturæ & ingenii bonitatem requirit , primum est institutio a puero , & quidem in loco ad disciplinam apto. Hanc etiamsi Schola & Academia , in quibus , præter alias utiles scientias & artes , medicina quoque docetur , inprimis constituunt , & sane ex viva voce & doctrinæ fidelium artis Professorum ejusdem exercendæ fundamenta communiter & quam tutissime hauriuntur ; illis tamen probe jactis , opportunum est ad ipsam praxin ( quæ dicitur ) clinicam , in Nosodochiis præsertim amplioribus ac bene dispositis se applicare , fido iterum ac perito Doctore præeunte. Plurimum vero ad Medici castrensis spartam rite ornandam se habilem is reddet , cui licitum est ipsis in castris medicinam facienti experto cuidam viro sæpius assistere ; ita enim eorum affectuum , quibus milites præ aliis hominibus familiariter laborant , naturas atque curationes mature cognoscet.*

## XII. Por-



## XII.

Porro non parum proderit *attenta lectio eorum librorum*, qui *castrensis medicinae* prudenter ac feliciter exercendæ, tam generalia quam specialia *præcepta*, & *observationes*, eo etiam spectantes, *accurate complectuntur*. Sunt etenim heic quoque *optimi sæpe consultores mortui*, & scriptorum talismodi bonæ fidei *sedula evolutio ac prudens inter se collatio* ad memoriam juvandam & iudicium medentis probe informandum haud exiguum confert utilitatem. Quod cum ita persuasum mihi habeam, non possum quin eorum, quos *de militari medicina divulgatos*, aut ipse vidi, aut ab aliis notatos inveni *libros atque tractatus* breviter recenseam.

## XIII.

*Inter antiquos* autem nemo occurrit, ad hunc censum referendus, potior *Hippocrate*, cujus non solum *supra jam laudata opuscula*, sed & *de affectionibus & epidemiorum diversi libri*, nec non *de officina Medici, de fracturis, articulis, vulneribus capitis*, pluresque alii, pleni sunt axiomatum ad Medicinam cum alias, tum in castris præsertim provide faciendam utilium; quamvis omnes, exceptis tribus illis primo loco positis, ad Chirurgicorum magis quam aliorum affectuum cognitionem atque curationem pertineant; neque etiam ad hodiernum Medicinæ statum præcepta illorum omnino quadrare puto, commendandos tamen ac legendos vel ideo existimo, si quis ex ipsis quasi fontibus haurire observationum & experimentorum vetustissimorum notitiam gestiat. Ceterum optima quæque istius *Hippocraticæ doctrinæ* momenta in *posteriores* suos *de re Medica* libros accurate transtulit, & meliori ordine disposuit atque locupletavit *Aur. Corn. Celsus*, quem propterea consuluisse pariter haud poenitebit.



## XIV.

Reliqui *veteres Medici scriptores*, supra illos, quod ad rem faceret, parum adiecisse mihi quidem videntur, ut lubens eos prætermittam. *Inter recentiores* autem extat *Arnaldi de Villanova regimen castra sequentium*, reliquis ipsius libris insertum p. m. 812. quod tamen quia breve admodum est, nec paucas continet ineptias, parum iuvabit lectorem. Primus autem, quantum mihi constat, qui notatu dignum aliquod *systema Medicinæ militaris* perfecit, *Raymundus Mindererus*, Archiater quondam Bavaricus, & Reip. Augustanæ Physicus fuit, cuius opusculum, eo ipso titulo, vernacula lingua editum Anno 1621 non modo quæ ad Therapiam, sed & prophylaxin morborum castrensiū pertinent, multaque alia, Medicum perinde ac ipsos milites, ad valetudinem curandum instruentia, candide & erudite complectitur, tanto magis æstimandum, quo magis a propria autoris, inter milites sæpe multumque verlati, experientia id profectum est.

## XV.

Qui post *Mindererum* simile secuti essent institutum, & *castrensem Medicinam systematice* tradidissent, vix ullos deprehendo. Recensetur equidem in *Lindenio renovato* p. 296. *Francisci Romani liber de militaris Medicinæ conditione*, qui editus sit *Neapoli*, sed citra anni & formæ designationem; ut fere dubium videatur, an nunquam iste liber in publicam lucem prodierit. Revera autem extant *duo illius argumenti opuscula Iani Abrahami a Gehema*, Equitis Poloni & Med. Doctoris, qui & ipse antehac tribuni militum officio functus fuit. Alterum ex iis Hamburgi impressum 1684. in 12. inscribitur *Wohlversehener Feld-Medicus*, varios infectatur *abusus circa Medicorum & Chirurgorum castrensiū*

*sium*



*sum* constitutionem & praxin, docetque qua ratione illis occurrendum sit, præterea etiam ostendit quibus medicamentis *Pharmacopolium castrense* instrui debeat. Hoc ipsum autem amplius in altero tractatur opusculo, cui autor titulum fecit, *der Krancke Soldat* : Editum id est Anno 1690. eadem quo prius forma. Continet vero utilem sane parænesim ad militiæ præfectos ac belli duces, ut meliorem, quam communiter fieri solet, curam suscipiant suorum militum, eorumque valetudini, tam diæteticis rebus, quam pharmaceuticis atque chirurgicis remediis decenter succurrant.

XVI.

Apprime autem hic notari merentur illi autores, qui *de morbis castrensibus* seorsim scripserunt, eo maiori in pretio habendi, quo pauciores existunt. Breve quidem est, sed ad usum practicum perutile opusculum *Danielis Ludovici, de morbis castrensibus*, lingua vernacula conscriptum, ac de-nuo cum eiusdem *libellis de dysenteria aliisque morbis epidemicis* editum a *Davide Kellnero*, Gothæ 1685. in 12. Paulo proluxior, nec minus elegans est *Joh. Valent. Willii de morbis castrensibus internis*, Hafniæ 1676. in 4. Agitur in eo non solum *de morbis castrensibus in genere*, sed & speciatim *de peste, febribus malignis, scorbuto, lue Gallica, catarrhis, debilitate ventriculi, alvi profluviiis*, horumque affectuum singulorum tam præservatione tam curatione. Porro extant *Tobia Coberi*, quondam Physici castrensis Cæsarei, *observationum Medicarum castrensiarum Hungaricarum decades tres*, in usum publicum recusæ, cum indice & præfatione *Henr. Meibomii*, Helmstadii 1685. in 4to. cuius certe libri lectio Medicis, ad milites curandos conductis, non poterit non esse perquam fructuosa, quoniam exemplis luculentis, & individuorum curationibus fideliter traditis naturam atque indolem morborum ejus generis insigniter illustrat.



## XVII.

Superfunt equidem fortasse plures libri, *de morbis castrensibus*, & *militari medicina*, mihi nondum visi; quemadmodum in catalogis memoratum invenio, *Antonii Snebergeri de bona militum valetudine conservanda* librum, Cracoviæ 1564. in 8. nec non *Martini Dickelii antidotarium militare*, quod Ienæ 1627. in 12. divulgatum, de communioribus belli tempore affectibus tractare perhibetur. Erunt vero etiam isti forsan minoris momenti. Taceo quoque complura *diversorum autorum scripta*, & *dissertationes* imprimis *academicas*, quæ unius duntaxat morbi castrensis evolvunt historiam atque curationem. Sic de sola *febre castrensi maligna*, quæ vulgo *Hungarici morbi* nomine venit, longam scriptorum enumerationem instituere liceret, perinde ut eorum, qui de *dysenteria castrensi* egerunt: sed iis omnibus nominatim proferendis supersedeo, non, quod inutilem castrensi Medico talium perlustrationum arbitrer, sed quod in tanta multitudine delectu opus esse censeam, quem quidem instituere iudicii mei tenuitas & modestia prohibet, eoque libentius abstineo, ne videar Medicum in castris versaturum, cui sane curta esse debet supellex, amplo bibliothecæ apparatu onerare velle.

## XVIII.

Non tantum vero *internorum affectuum*, qui in militia frequenter occurrunt, sed & *externorum*, quæ ad *Chirurgiam referuntur malorum* notitiam habere debet *castrensis Medicus*, & adeo ipsius *chirurgiæ* haud leviter esse peritus. Profecto enim crebriores ferme sunt casus *vulnerum*, *contusionum*, *fracturarum*, *ambustionum*, (præsertim quando bellum serio agitur pugnis & obsidionibus) quam morborum internorum, quibus milites magis otiose in castris atque præ-  
sidiis



sidiis viventes corripuntur. Tametsi autem illis, ab externa vi ortis corporum læsionibus curandis, *chirurgi castrenses* communiter ac velut unice præfecti habeantur, quorum etiam ( dummodo eruditi & exercitati bonique satis sint ) curæ ac fidei negotium istud, levioribus præcipue casibus, & prima quasi instantia relinquendum est, *gravioribus* tamen *malis* succurrere, & arduas ancipitesque operationes, e. g. *profundas* ( telorum inhærentium causa ) *sectiones*, *cranii trepanationes*, *membrorum amputationes* &c. dirigere debet ipse *præsens Medicus castrensis*, & in universum istud genus hominum, plerumque iusto minoris scientiæ & conscientiæ, in officio suo diligenter continere atque corrigere.

## X I X.

Vt igitur huic etiam parti muneris sui satisfacere queat *Medicus castrensis*, idem quod in §. XI. iam notavi, *subsidium insigne, matura scilicet ac sedula talium rerum in castris & nosodochiis observatio*, & frequens ad easdem *manuum applicatio*, maximi est momenti. Quare iamdudum *Hippocrates in libello*, quem *Medicum* inscripsit, illis qui ad graviores istam chirurgiam pernoscendam & exercendam idonei cupiunt fieri, consilium dedit, *ut militiam & exercitum sequantur*. Cum enim affectus illi externi plerumque oculis facile percipiantur, ad eorundem quoque tractationem rite addiscendam crebrior avtopsia non poterit non prodesse plurimum.

## X X.

Quam autem supra, ad morbos castrenses internos, bene cognoscendos atque curandos, profuturam ostendi *optimorum autorum lectionem*, eadem non minus erit utilis *circa externos affectus & chirurgicos casus*; quemadmodum etiam consultum est, ea penitus habere perspecta, quæ generaliter  
ad



ad officium chirurgi castrensis pertinent. Tales institutiones, sub titulo *Neue Feldscherer-Kunst* / edidit *Joh. Agricola*, Francofurti 1634. in 12. concisas quidem, sed quæ complures practicas cautiones & præcipue *chimicorum remedium applicationem ad chirurgiam* pulchre edocent. Locupletior tamen est *Matth. Gottofr. Purmanni opus*, eiusdem argumenti, quod Lipsiæ anno 1693. in 8. prodiit. Illius etiam auctoris extant, eodem anno, forma & loco publicatæ, *historiæ & curationes quinquaginta vulnerum sclopetis inflictorum* (*Schuß-Wunden-Curen*) eruditissime profecto consignatæ. Nec minoris pretii sunt *Joh. Caspari Schvvarzii observationes vulnerum, casim, punctim & alio modo factorum*, (*Vier Duzent Anmerkungen von gehauenen / gestochenen / und andern zufälligen Wunden*) Hamburgi 1713. in 8. His e Gallorum natione addo scriptorem nuperum, *Belloste*, cuius liber (*Hospital- und Lazaret-Chirurgus*) in nostrum idioma translatus est Dresdæ 1703. in 8. Exhibet autem *omnis fere generis vulnerum exempla atque curationes*, & inprimis demonstrare nititur, *quomodo pleraque sanari queant sine turundis*; quarum quidem abusum adeo vituperat, ut usui exiguus aut vix ullus relinquatur locus.

## XXI.

Horum aliorumque scriptorum, qui *Medicinam chirurgicam in castris* ipsimet diu exercuerunt, propriasque observationes suas fideliter recensuerunt, attenta consideratio, ad similia feliciter tractanda non parum sane commodare poterit; quo magis alias (*dictitante Seneca*) *longum est per præcepta iter, breve & efficax per exempla*. Quapropter bene sibi consulet, qui, ubicunque tempus & occasio permittunt, istiusmodi *observationum Medico-chirurgicarum libros* studiose pervolvit; quales mihi præ ceteris commendandi videntur



dentur *Guil. Fabricii Hildani, Jobi de Meeckren, Heinrichi de Roonhuysen, Joh. Muys, Ido Wolfii*, quibus haud immerito annumerandas existimo laudati *Purmanni* novissimas *observationes chirurgicas*, anno 1710. in 4. excusas. Neque carebit fructu multiplici eorum autorum lectio, qui *unum alterumve chirurgie caput* speciatim attigerunt, e. g. *Jac. Berengarii Carpensis de fractura cranii, & Waltheri Schulzii* eiusdem argumenti tractatus, *Francisci Botalli* & aliorum, qui cum eo prodierunt, *de vulneribus sclopetorum, Hildani* modo citati *de combustionibus, igne, pulvere tormentario &c. factis*, nec non *de gangrana & sphacelo &c.*

## XXII.

Sed quando *Hildani* mentionem denuo facio, succurrit ejusdem quoque *cista militaris, sive consignatio earum rerum, instrumentorum ac medicamentorum*, quibus ad curandos milites in castris opus est. Ac decet profecto de illis sollicitum esse *Medicum castrensem*, adeoque *rei pharmaceuticae* haud leviter grarum. Quamvis enim amplo exercitui non raro prospici soleat *necessario pharmacopæie apparatu*, eidemque singularis artifex cum ministris præficiatur, debet tamen hic etiam *Medicus castrensis director esse omnium*, & providere, ut quantitate & qualitate legitima præsto sint ac rite non minus præparentur quam dispensentur remedia, denique ut *superiorum & inferiorum chirurgorum cistæ* (*Regiments- und Compagnie-Feld-Kasten*) probe instruantur. Talis quidem apparatus descriptiones & paradigmata a variis, præter *Hildanum*, autoribus tradita esse non dubito; perplacet autem inprimis laudatissimi *Ludovici delineatio pharmacopæie castrensis*, quam opusculo suo supra deprædicato adjecit. In ea sane vir optimus demonstrat, quomodo sumptibus exiguis ad plerosque casus

C

instrui



instrui queat *pharmacopolium castrense* ; quod consilium sequi aut imitari tanto utilius erit , quanto gratius existit ducibus atque praefectis militiae , si in valetudinem miserorum militum quam minimi sumptus fiant. Ego vero manum de tabula : tametsi plura , *ideam boni Medici castrensis* collustrantia , afferre in medium possem , persuasum tamen habeo , neminem , qui enarratis *qualitatibus & requisitis* pollet , isto titulo indignum aut ad rem laudabiliter gerendam ineptum fore.

S. D. G.

---

Pag. 4. lin. 3. leg. *Troiano*. pag. 5. lin. 20. leg. *muneribus*. pag. 7. lin. 25. del. *in*.

---

**C***Hara mihi Soboles , Medici Castrensis  
ideam  
Praesens demonstrat Tua Dissertatio  
docta,  
Ut sis forensis Medicus, Castrensis ut audis,  
Insuper eripias aegrorum corpora letho,  
Ut bene procedat quaevis curatio coepta,  
Ex animo toto Genitor Tuus optat orante.*

AUGUSTVS FLECK,  
Pastor Leostein. & Praefect.



**D**u zeigst / Herz DOCTORAND! in diesem  
Werck anheute /

Was ein Feld-Medicus, an statt der Sieges-Beute/  
Zu observiren hat/ wann er sich in dem Feld  
Bey allen stellet ein/ als ein beliebter Held.

Vermuthlich wilst Du uns durch dieses demonstrieren/  
Was Du gesonnen bist forthin zu practiciren/  
Und legst / statt einer Prob / gelehrt und rühm-  
lich dar /

Worinn Du Dich geübt bißhero etlich Jahr.  
Nun kanst Du recht vergnügt die süsse Ruh erlangen/  
So kanst Du als ein Mann mit Wissenschaften  
prangen /

Da Du in Studien Dich Tag und Nacht geübt/  
Und deren Nectar stets für allen hast geliebt.  
Diß hast Du / Werther Freund! auch in der That  
bezeigt /

Dann Du warst jederzeit den Studien geneigt/  
Die kluge Wachsamkeit hieltst Du im grösstem  
Werth /

Ja ein geschicktes Buch war stets Dein Tummel-  
Pferd.

Du suchtest jederzeit mit Wissenschaft zu grünen/  
Auch jezt dem Vaterland mit guter Frucht zu dienen.  
Drum wünschet tausend Glück zu Deinem neuen  
Stand

Ein sehr getreuer Freund mit Herzen/ Mund und  
Hand.

STEPHANVS BAVRIEDEL,  
p. t. Pastor Altenthannensis.



**D**octrinam in pretio quis perneget esse?  
resurgit,

Altior, & merita laude superba viget.  
TVque etiam, FLECKI, claras exculte per  
artes

Ostendis studii clara tropoea Tui.  
En favet ipsa Hygie, fortunatosque labores,  
Vtque TIBI cedant prospera quaeque,  
vovet.

*Nobilissimo nec non Doctissimo DN. LICENTIATO,  
Affini honoratissimo, amicitiae & honoris gratia  
pauca haec adiecit*

M. SAMVEL NAVMANN,  
p. t. Pastor Fürstenwald.  
& Fürstenau.

**S**edulitas comitem meritum quod servet  
honorem,  
Hoc doctum specimen magis, AMICE,  
probat.

Hæc pauca Nobiliss. atque Pereximio  
DN. LICENTIATO gratulabun-  
do animo apponere voluit

IOH. MATTH. Frauendiener /  
Med. Stud. Oppon.

